

欽定剿平粵匪方略

欽定剿平粵匪方略卷三百十一 壬戌年

六月十四日

乙丑

都興阿奏言上游官軍乘勝傳

紮金陵軍威甚盛臣思金陵爲賊老巢負固已久渠魁所在各路接應必多且城勢極寬攻剿合圍均非易易曾國荃乘勝直擣逆巢逼近紮營數十座布置周妥黃翼升督船下駛吳全美等師船在沿江各口喫重處所分泊扼要布置

防勦現據探報逆首普忠護聽四僞王各率黨
與分援金陵已抵龍潭等處勢甚猖獗並分犯
石埠橋東陽鎮一帶欲渡江北竄又據探報江
南百姓避賊逃難上至螺螄溝下至沙頭鎮張
網溝一帶晝夜渡江紛登北岸日以千數均皆
薙髮大半年力精壯聲言欲分投裏下河各屬
謀生查百姓於賊匪始至時扶老攜幼流離奔

竄勢所不免茲南岸居民相安已久忽爾紛紛
北渡情屬可疑顯係該逆臆我上游官軍得手
揚防各營或有疏懈出我不意暗伏內應以圖
逞其狡詐臣當卽通飭各營嚴密防範並移行
地方各屬張貼告示一體嚴防查拏奸細並由
黃彬分撥師船上下梭巡一面飭知下游各幫
水師隨時嚴密探防斷不敢稍生疏懈臣又派

營總富陞帶馬隊百名會同遊擊傅璋等駐紮
仙女鎮稽查聯絡聲勢以期有備無患奏入

上命議政王軍機大臣傳諭曾國藩都興阿曰都興
阿以江南百姓避難北渡聲言赴裏下河各屬謀
生情屬可疑已通飭各營嚴防令地方官訪拏奸
細並由黃彬等分撥師船上下梭巡堵剿復派富
陞等駐紮仙女鎮稽查辦理均極周密賊匪圖犯

北岸難保不乘我不備布置內應冀得遂其狡謀
都興阿務當通飭各營一體嚴密防範毋任奸匪
潛跡致生他變當此賊氛甚惡之時江面何得有
如許船隻渡民逃難其爲賊之豫伏奸慝不問可
知現在已渡江者如何設法安置使之不能逞其
陰狡尤不可任聽分往裏下河等處其未渡者仍
飭水師各營認直梭巡如何盤查如何遏截均不

得有名無實致貽後患龍潭官軍撤退前據馮子材等奏報當經諭令曾國藩等查明確實情形具奏王明山等師船曾否下駛李世忠攻圍九洑洲有無把握並著該大臣察度情形分別催令進剿以牽賊勢近日防剿情形並著隨時奏聞江面隘口林立港汊紛歧應如何分撥師船添兵防剿之處並著會商都興阿妥爲布置毋任紛竄總之金

陵爲匪首老巢該逆等在所必救援賊之來必須
合力痛勦使外賊不得入內賊不得出石城雖大
而且堅久之自成釜魚阱獸諒該大臣等成算在
胸必能籌策萬全迅速奏功也江北各境均已肅
清斷不可使一賊得以偷渡致爲牽掣辦理又形
棘手曾國藩卽飛飭水陸帶兵將弁及沿江各地
方官一體實力稽查防範毋稍疏懈

同日鄭元善奏言西路粵匪自鐵門一戰後卽
盤旋於新澠之交意在窺伺洛郡因聞我軍防
守甚嚴該逆遂向宜陽大路潛竄澠池縣知縣
張應煒率勇追勦遇賊於嶠店擊斃二百餘名
五月二十二日楊飛熊密飭參將盧得勝督隊
由姚灣進擊其時賊踞宜境之大辛店我軍大
呼奮殺賊卽潰奔追殺十餘里斃賊三百餘名

敗匪竄往嵩縣之鳴皋鎮一帶並在九皋山屯紮二十五日賊騎駛至該縣東關知縣彭繩祖等登陴守禦轟斃馬賊多名該匪分股擾及伊陽二十七日直撲縣城知縣謝金誥激勵團勇出城迎敵槍斃紅衣賊目數名賊卽竄至汝州之沙古堆卽在汝河北岸紮營署知州任愷會營督勦前上蔡縣知縣黃衡協調團練夾攻乘

夜踏平賊壘逆衆退回南岸淹斃者數百人六月初一日署郟縣知縣陳桂芬復在長阜禦賊勝之賊竄葉境初二日攻撲城垣知縣秦茂林督團擊退斃賊多名該匪全行東竄其項城擊敗之馬融和等股匪紛竄上蔡之齊海寨及西平之王灣經團勇擊殺多名復竄遂平之神溝廟等處署知縣羅雋馳往迎剿賊始卻退餘衆

分竄確山之竹溝並駛及舞陽地方查兩路逆蹤勢將併合臣前派赴洛之楊長春計尙未到其餘各隊卽先飭盧得勝暫統與續派剛銳三營兩面撓合又商由勝保抽撥馬步千人臣亦飭唐漢平等勇隊一千名交知縣王珠燁管帶前進以厚兵力至信羅一帶已據楚北督撫臣來咨分起派兵越境會剿臣當卽抽撥馬步督

飭蒯賀蓀南行以期合力夾擊臣在汝暫駐數
日布置妥協後卽酌分兵力親督馳赴襄葉等
處察看何路緊急先往何路策應再據河陝汝
道廣隆陝州知州王詔續稟此股粵匪出關繞
行山僻小路五月初五日突撲閬鄉縣城致被
占陷廣隆王詔等聞信督兵馳援賊見官軍踵
至奪門逃竄追殺百餘名當將城池克復查明

閔鄉縣知縣王其昌巷戰被戕署典史程世濟
同時遇害合無仰懇

天恩俯准將署閔鄉縣知縣王其昌署閔鄉縣典史
程世濟均照陣亡例從優議卹並於死事地方
建立專祠以慰忠魂奏入

上命議政王軍機大臣傳諭勝保鄭元善曰西路之
賊已由新澠之交向宜陽大路潛竄疊撲嵩縣伊

陽葉縣城垣經各地方文武及帶兵將領堵剿並於澠池之嶺店汝州之沙古堆等處疊有斬獲其項城被剿股匪由上蔡西平遂平確山駛竄舞陽兩路賊蹤均剽疾異常所過州縣地方雖稱均被兵練擊走其蹂躪荼毒可想而知現在舞陽與葉縣兩處勢將併合尤恐逆燄愈張剿辦愈難爲力據鄭元善奏稱已商勝保分撥馬步千人及飭知

縣王珠煒管帶唐漢平勇隊千名與楊長春等各軍會合進剿勝保前所派撥各軍衡以現在賊勢似尙未敷剿辦該大臣仍應督軍親往迅圖掃蕩方期得力著勝保酌度情形妥速辦理信羅一帶楚師業已越境該撫卽飭蒯賀蓀等合力剿辦

上諭內閣曰西路粵匪被剿奔竄河洛已無賊蹤仍著該撫督飭地方文武迅速掃蕩毋任蔓延著閩

鄉縣知縣王其昌署閩鄉縣典史程世濟均著照
陣亡例從優議卹並於死事地方建立專祠以彰
忠藎

十五日

丙寅

慶端奏言查瑞安平陽以飛雲一江

爲界北岸係瑞安管轄南岸卽屬平陽大股逆
匪竄踞瑞安復分股圖竄南岸五月初四日副
將吳鴻源統帶師船駛入飛雲江與遊擊陳允

彰等勇船合幫進剿該逆蟻聚江中我軍開礮
擊斃賊數十名各隊奮勇登岸復擊斃數百名
初七日吳鴻源等水陸進攻瑞安該縣知縣黃
宗貴等派隊策應我軍由三都嶺直擣巢穴水
勇登岸攻擊賊卽由陶山遁回青田其金角山
賊寨亦爲張啟煊等攻破知縣徐承禧管帶興
勇在平陽扼要駐紮初八日徐承禧會合遊擊

李朝安將賊船浮橋燒燬乘勝渡江攻剿殺賊甚多初九日徐承禧李朝安等率勇渡江甫近北岸逆匪五六千人齊至江岸抗拒徐承禧等揮軍奮擊賊衆敗退回巢我軍登岸分三路進攻忽有大股援賊從山後衝出李朝安部勇合力齊攻立將賊巢攻破追殺十餘里殲斃賊黨四百餘名其永嘉縣轄之瞿溪等處踞賊時伏

時動溫處道支方廉督飭鄉團四路兜剿總兵
秦如虎復率隊夾擊追逐三十餘里溫郡瑞安
現在已無賊蹤其松陽一路援賊由湯溪武義
絡繹而來總兵林文察副將曾元福等督軍夾
攻署處州府知府李澍等調帶民團分兩路扼
堵該逆二三萬人三路來包我軍奮戰民團亦
出助陣鏖戰逾時焚燬賊壘二十餘座斃賊一

千餘名十六日林文察督勇設伏令曾元福一軍誘賊出戰伏兵起而截之斃賊三四百名山後賊援突出外委曾登貴並各勇分隊迎擊該逆奔竄各壘出賊四五千我軍奮力擊之斃賊不少餘匪奪路回奔處州官軍連日亦獲大捷查逆匪竄犯溫瑞意欲取道入閩擾我完善因兵勇民團齊心戰守疊次痛剿無間可乘隨由

青田退竄青田與溫州之泰順處州之景甯雲
和均係接壤泰順景甯雲和又與閩省之福鼎
霞浦壽甯路路可通其雲和與松溪政和亦僅
慶元龍泉一縣之隔賊雖山沒靡常雖保不固
旁竄仍爲窺閩之謀節飭道員曾憲德署臬司
張銓慶等布置嚴防茲據曾憲德等稟報溫瑞
敗逆分竄青田之九都白巖等處焚掠趨重奉

順並據張銓慶馳稟青田逆匪於十三日竄陷
景甯十四日徑竄雲和臣飛飭張啟煊統帶各
軍迅由泰順迎頭截擊而令秦如虎率部攻拔
青田又調遊擊白瑛一軍馳赴龍泉進剿並由
臣軍營酌抽兵勇分赴松溪政和扼防一面
飭張銓慶督率龍泉慶元兩縣集團堵禦其臨
鼎壽甯兩縣亦飭曾憲德派兵扼守以固閩防

所有溫郡瑞安在事出力員弁兵勇紳團人等
可否擇尤酌保出自

恩施奏入

上命議政王軍機大臣傳諭慶端左宗棠曰溫州瑞
安平陽永嘉等處踞賊經官軍截擊敗竄青田該
處與泰順景甯雲和接壤而泰順等縣又與閩省
之福鼎霞浦壽甯等處路路可通其雲和與松溪

政和亦僅慶元龍泉一縣之隔賊蹤出沒靡常難保不伺隙旁竄仍爲窺閩之謀著慶端飭令道員曾憲德等嚴密扼守以固閩防並飭張啟煊由秦順迎頭截擊其秦如虎各軍宜如何分路扼剿著相機調派閩浙交界防務風聞甚爲鬆懈慶端當力圖振作嚴飭將士不可令賊匪闖入閩疆遂其旁竄之計如有疏虞惟慶端是問所有溫郡瑞安

出力人員著俟該郡全境肅清再行擇尤請獎再甯波收復以後前經諭令慶端左宗棠派員前往辦理防守事宜是否已經派往著該督等卽行馳奏前據曾國藩奏稱探聞湖州失守尙未據慶端左宗棠奏報著一併深明具奏

十七日

戊辰

僧格林沁奏冒現在時艱孔棘各路

統兵大員督撫大吏宜如何殫竭血誠力圖補

救若仍前含混爲將帥者市恩於麾下爲督撫者見好於屬員則民生何日得安逆匪何日得平若爲將帥者謂有賊可以固寵爲督撫者謂敷衍可以保榮何以仰對

先皇而答

陛下臣詳閱部頒蔣琦齡原奏所陳各條均屬切中時弊卽如各路軍營每以將佐一戰之功遽行

優保甚至副將保以總兵升用賞加提督銜守
備則越級保升叅將我

皇上逾格恩施俯如所請得保者固知感激而嗣後
按級保升者則視爲平常矣當年川楚軍務將
士血戰數年而保至一品者並無多人今輒越
級保舉試思文武仕途共有幾級無怪將佐志
驕意滿始勤終惰至獲咎文員但能營謀入營

稍有微勞即可開復原官無怪做官方之不肅
蓋有所恃而不恐矣至蔣琦齡奏請添派監軍
御史固屬未協但各路軍營若無稽查則奏報
失實濫保無功愈無底止應請

皇上密派賢員數人分赴臣軍營及各路軍營認真
密查是非自見此後有紀律謹嚴賞罰平允奏
報從實者及積習相沿鋪張粉飾者均令指名

上陳庶賢者奮興愚者亦知儆戒也現在賊鋒
已挫各路統兵大員若能乘此勢機會齊進剿
江北逆氛可望掃蕩近日軍務每患缺餉而餉
缺由於徵收之不足各省州縣其中有被賊蹂
躪者有水旱蟲災野無青苗者不能開徵理所
必然亦有水旱偏災賊竄邊境者不肖州縣藉
此措詞亦報不能開徵其實災輕之區良善之

民誰未納賦不過州縣意圖肥己私徵匿報刀
生劣監奸書蠹役從而挾制官吏州縣不得已
任其瓜分以免生事從此地方百姓輕視官長
紳團得以跋扈抗差抗糧習爲常事地方道府
職司監察耳目切近豈無所聞或有喜其逢迎
代爲緘默大吏偶有風聞又念道府情面姑且
容之直至斷難姑息始行叅革撤任豈知事已

不可收拾又豈知被劾之官私橐已飽去就皆
可任意耶若不嚴定章程實力勸懲軍餉何日
得充官方何時能肅臣爲軍務地方大局攸關
謹據實直陳奏入

上諭內開曰前因各路軍營積習日深曾經通諭各
營痛除諸弊力加整頓今僧格林沁所奏意見亦
適符合各路統兵大臣及督撫大吏奏報情形多

至失實或市恩麾下見好屬員每以將佐一戰之
功遽行越級優保或獲咎文員營謀到營稍有微
勞卽可奏請開復原官賞重罰輕何以昭激勸而
勵戎行若爲將帥者謂有賊可以固寵爲督撫者
謂敷衍可以保榮居心更何可問僧格林沁以督
兵大員肯將軍營積弊據實上陳具見公忠體國
不染習氣甚屬可嘉現在各路統兵大臣及督撫

大吏實心任事者固不乏人而粉飾因循不知振作者亦復不少嗣後奏報情形儻仍前含混欺飾任意鋪張或濫保無功市恩邀譽並妄爲獲咎劣員開復處分以致紀律不嚴軍心解體經言官叅劾或朝廷別有訪聞必將該大臣督撫等從重懲處以肅軍律決不寬貸至軍行首重餉需近來各省徵收錢糧率多缺額州縣牧令每遇偏隅水旱

或賊竄邊境卽以闔境均被災擾報請蠲緩仍行
私徵肥己道府代爲緘默大吏徇情容隱以致吏
治日弛餉源日絀實堪痛恨著各督撫嚴行查察
如有此等情弊立即據實叅辦毋得再事寬縱儻
仍積習相沿不加整頓必將該督撫嚴行懲處毋
謂誥誡之不早也

十八日 己巳 曾國藩奏言查劉于潯奉

旨補授甘肅按察使該員在江西本籍管帶水師攻
守八年卓著戰功現在浙氛未靖江西邊境時
時戒嚴恃劉于潯水師巡防河面以備緩急勢
難令其馳赴新任該軍多係江西土著亦無員
可以接管相應請

旨飭下陝甘督臣將甘肅按察使一缺遴員署理由
臣行知劉于潯俟鄰警稍紓再行奏請

陞見奏入

上諭內閣曰甘肅按察使劉于潯前在江西本籍管帶水師戰功卓著現在浙江賊氛未靖江西邊境時時戒嚴自未便驟易生手劉于潯著准其暫留江西辦理防務俟鄰警稍紓卽行馳赴新任

曾國藩又奏言近日軍情嘉定青浦兩城被髮逆巨股圍攻逆燄殊熾李鴻章所派湘淮各勇

駐紮虹橋者被髮逆四面圍裹李鴻章親往援
救五月二十一日內外夾擊大獲勝仗惟賊氛
環逼李鴻章目下斷不能移紮鎮江楊載福於
二十三日到皖後旋至舒城與李續宜會晤一
次再駛往金陵籌商戰守事宜曾國荃圍金陵
之師於五月十二十三日在雨花臺獲勝一次
惟地面太寬兵力太單多隆阿又統兵入陝不

問

能踐東下會剿之約近聞僞忠王蘇州大股將
援金陵陸路孤軍深入旁近無勁旅援應頗爲
可慮鮑超一軍於五月十五日進攻甯國之抱
龍岡等處連平賊壘獲勝已於敬亭山三面圍
逼甯國賊多糧少當可得手奏入報

同日光祿寺卿潘祖蔭奏言楚軍乘勝近逼金

陵當此聲威丕振正大局安危所繫近聞鎮江
揚州旣慎巡防亦能援應賊卽欲渡江分擾以
爲牽掣之謀當已有備惟通州靖江泰興等處
江港可通者凡十有三由江南之太倉常熟江
陰出口卽能闌入江北港中向來雖有巡查不
過虛應故事賊若乘虛竄擾恐裏下河完善之
區菁華復竭江北軍餉更無可籌相應請

旨飭下兩江總督曾國藩江蘇巡撫李鴻章妥籌防
守毋令賊得逞其狡智奏八

上命議政王軍機大臣傳諭曾國藩李鴻章曰潘祖
蔭奏楚軍乘勝近逼金陵大局安危所繫鎮江揚
州已有備禦惟通州靖江泰興等處江港可通者
十餘處由江南太倉常熟江陰出口卽能關入賊
若乘虛擾及裏下河等處江北軍餉無籌等語著

曾國藩李鴻章設法兼顧派令妥員防守保全完
善之區

十九日庚午袁甲三奏言查石埠橋龍潭東陽等

處係鎮揚皖三軍進兵要道又爲蘇常逆匪救
援金陵必由之路石埠橋地臨江濱尤關緊要
臣屢囑李世忠嚴密防範旋據李世忠呈稱五
月二十日金陵城內突出賊衆萬餘乘夜攻撲

石埠橋營盤均經擊卻適李世忠營中派撥提督李顯發帶領水路各隊由六合渡江該逆列隊江邊不容我軍登岸都司龔文林等將礮船排開川大礮轟擊血路頓開就勢上岸搶進營盤會同原駐將弁實力守禦該逆計無可逞隨即解圍而去二十三日復又乘霧來撲我軍再戰再卻之時另股賊衆竄撲東陽龍潭營盤李

顯發分兵往援亦獲全勝該逆調集蘇常大股
悍賊由句容竄至東陽該處參將黃承恩等竭
力堵剿賊來愈衆自金陵朝陽門至石埠橋數
十里徧地賊蹤東陽龍潭營內米糧無多軍火
用罄萬難爲守遂於二十五日整隊撤併石埠
橋聯絡紮營以資抵禦該逆屢次圍撲均經我
軍擊敗訊據生擒賊供賊首僞護王陳坤書必

欲奪石埠橋要隘爲金陵東北屏蔽是以晝夜
攻打等語李世忠一面添撥隊伍飭派李昭宸
等各率所部兵勇由六合通江集划子口渡江
援應六月初五日李顯發會合皖營水師礮船
龔文林等攻毀江邊賊匪石壘一座斬首八百
餘級賊氣稍奪初六日會合下游水師副將魏
麟彪大紅單礮船並皖營水陸兵勇先踏西面

賊營連破賊壘五座擒斬一千餘名維時李昭
宸等隊伍均陸續南渡水師密排江邊兵威壯
盛李昭宸復聲言李世忠親帶大隊卽至並縱
生擒賊匪二名使其傳語賊衆賊果慌亂紛紛
棄營潰敗我軍分投追殺殲斃二千餘名生擒
四百餘名僞護王帶敗賊竄回金陵附近石埠
橋賊營十餘座均被我軍一律平毀要隘可保

無虞頃據探報常州賊衆上竄金陵逆勢未衰
一時尙難攻拔並接曾國藩來函亦稱金陵城
大賊衆尙須另調勁旅先翦旁近州縣或兩路
攻取東壩常州使金陵與蘇杭隔絕乃可徐圖
合圍等語是金陵現尙無機可乘臣已諄囑李
世忠督飭將弁嚴密扼守石埠橋站穩腳步聽
候曾國藩調度再行進取此次擊賊獲勝實賴

水師之力應請將管帶礮船都司龔文林免補
都司以遊擊儘先補用並加副將銜再九狀洲
四面環水蘆葦如林該逆恃險負固李世忠所
派李顯爵一軍仍在江北紮營相持未敢深入
上游水師仍泊江心洲一帶亦尙無克復之機
奏入

上命議政王軍機大臣傳諭曾國藩袁甲三都興阿

曰石埠橋爲金陵東北屏蔽此次李世忠將東陽龍潭各軍撤併堵剿並調派援軍分設渡江竟能以少擊衆轉危爲安殊堪嘉尙惟金陵城大賊衆石埠橋等處爲南路要隘賊所必爭難保不去而復來仍著袁甲三飭令李世忠督率在防將士嚴密防堵先爲自固之謀庶可相機進取並著曾國藩妥籌兼顧隨時分兵策應毋令已據之險稍有

疏虞至金陵逆勢未衰曾國藩函致袁甲三所稱
先翦旁近州縣或兩路攻取東壩常州徐圖合圍
之議尤屬切中兵機卽著與都興阿等妥速會商
慎籌一切進止機宜策畫萬全以期必勝至各路
援賊一經戰敗難保不鋌而走險江北地方完善
港汊紛歧曾國藩都興阿務須恪遵歷次諭旨力
籌守禦裏下河一帶兵力空虛亦應加意毋稍疏

解

袁甲三又奏言據李世忠呈稱前解赴曾國藩
軍營審訊之通匪革弁張威邦在滁州拏獲後
隨卽起解詎於五月二十七日行抵全椒因病
身故臣查張威邦係奉

旨拏問之員既經在途病故應由地方官驗訊詳辦
臣批飭全椒縣親詣驗明是否實係患病身死

聞

抑係畏罪自盡務得確情詳由曾國藩覆覈辦理奏入報

同日署貴州巡撫韓超貴州提督田興恕奏言粵逆竄至正安州分水嶺地方搶踞山梁四月初八日署知州陳鑄帶練分作兩隊奮躍上山縱火將賊棚焚燬斃匪四百餘人餘匪越嶺逃

逸陳鏌復派關扼要嚴防其分竄桐梓逆匪欲
由板橋大路直竄遵義署知縣于鍾岳分派隊
伍紮隘堵擊副將劉元勳撥兵練三百名赴桐
梓縣城助守該逆見有備禦卽由元田壩分竄
逼近遵境北鄉一帶于鍾岳親帶隊伍馳往督
剿四月二十日師至毛石坎因紮駐大防之團
營失利分隊赴援又復敗退其時分紮各隘練

丁猝難抽調于鍾岳遂紮駐水口寺要隘以遏
竄城之路該逆卽自北而西竄往鴨溪金刀坑
樂民城等處大肆焚掠並分股擾及八里水距
城甚近于鍾岳添調在南鄉剿匪之候選知縣
羅燦奎帶練從西路攔頭迎擊並派隊進紮八
里水分攻金刀坑樂民城之賊小有斬擒該逆
遂麤聚鴨溪時總兵吳安康一軍已由密山拔

營馳抵遵郡羅燦奎亦奉調馳至軍威大振連
日開仗屢戰屢捷二十八日夜羅燦奎先挑勇
百名暗入鴨溪親督後隊繼進該逆拌命拒敵
我軍槍礮齊施斃賊二百餘名于鍾岳督隊助
勦該逆抵敵不住連夜由白蜡坎遁逃我軍追
殺數十里沿途多有斬殺匪勢不支由黔西州
邊界清水塘一帶竄往四川永甯縣境總兵吳

安康現已親督大隊跟蹤追剿臣等嚴飭該總兵會合川省官軍偵賊所至實力剿擊務期悉數殲除以靖地方奏入

上命議政王軍機大臣傳諭略秉章韓超田興恕曰石逆前由黔境竄入川省敘永由興文長甯一帶逼近敘郡曾據略秉章奏稱已派遣員曾傳理等分投截剿韓超等復飭總兵吳安康督隊追剿卽

著駱秉章等嚴飭曾傳理等會合夾擊該逆勢雖
窮蹙而到處勾結附和屢爲川黔之害若不先除
此股則川省大軍爲所牽掣難以兼顧他處務當
乘此機會迅速殲除不可再任蔓延

欽定勦平粵匪方略卷三百十二 壬戌年

六月二十三日 甲戌 勝保奏言 臣於初六日自帶

馬步小隊由項城折向大營行抵槐店卽接西路各處探報賊衆因聞陳逆業已擒斬喪膽狂竄已成窮寇飄忽靡常若視其所向親往尾追勢必反落後著 臣當派副將王佐臣管帶黑龍江頭二起馬隊及成順全營馬勇共一千餘名

馳往鄆城迎勦並飭以賊如向南奔竄卽向舞陽一帶進勦如賊仍在西北卽向襄郟一帶截擊計日當已遇賊接仗臣仍隨時查看如賊勢衆多一時未能得手仍當親督大軍策應並可就近與鄭元善會商督勦以期迅殄逆氛奏入上命議政王軍機大臣傳諭勝保曰前因逆匪由潼關東竄豫省情形喫重疊經諭令勝保統率所部

馳赴河洛相機剿辦近日河洛雖無賊蹤惟該郡
居天下之中關繫中原大局況陝省回匪乘機竊
發而鄖西之賊竄近荆子關經鄭元善調派各軍
由宛城進剿雖保不偪回陝省擾及潼關自應於
河洛駐紮重兵俾秦豫兩省得以隨時策應勝保
所統馬步各隊頗多勁旅著仍遵前旨迅督大隊
馳赴河洛擇要駐紮毋得再事遷延致滋貽誤

同日山東道監察御史王蘭谷奏冒失陷城池
之守土州縣定例褫嚴閒有被賊闖入當卽督
兵克復並城陷之先調往他處辦理防勦旋即
隨同克復等情僅予革職示懲者自係因其情
節可原量從末減惟聞棄城不守之員往往捏
飾此等情形希圖免罪儻相率效尤誰復嬰城
固守擬請

旨通諭軍務省分各督撫認真查辦如實有前項可
原情節自應量子末減係賊匪自退並聞警
先逃捏詞巧避定行按律懲辦以昭炯戒不得
瞻徇容隱致滋貽誤奏入

上諭內閣曰州縣失陷城池定例甚嚴聞有被賊闌
入卽行督兵克復或城陷之先調往他處辦理防
剿旋即隨同克復者尙可量從末減乃近來棄城

不守之員往往捏飾前項情形而該督撫等亦並不詳加查覈率行奏請免罪實屬不成事體嗣後軍務省分各督撫務宜破除情面如守土之官聞警先逃或係賊匪自行退出並非帶兵克復捏詞巧避者卽按律從嚴叅辦以示懲戒該督撫毋得瞻徇容隱致干罪戾將此通諭知之

同日

上諭內閣曰軍興以來百姓顛沛流離慘遭荼毒朝廷憫念民艱命將出師除暴戡亂更以脅從罔治之意詔諭各路將帥至再至三原期該統兵大臣等咸體此意以出斯民於水火近聞江浙等省被脅難民有乘閒逃出者兵勇見其頭髮較長或面有刺字不由分辨奪其所有殺以冒功帶兵員弁率以擒斬髮賊呈報冀邀獎敘以致身陷賊壘者

僉謂不散尚可苟延逃出反以速死遂激成從逆之心而不悔是吾民旣死於賊又死於兵痛孰甚焉又況賊匪所踞之地不許百姓薙髮歷時旣久狀同髮賊更有被徧勉從作爲軍帥旅帥等名目陽代賊匪徵求供給陰以保衛鄉閭希冀賊不親往蹂躪及被賊擄去迫令前驅以撓鋒鏑者此等情形實堪矜憫著各路統兵大臣出示曉諭兵勇

凡遇被脅逃出之難民苟查無兇器及可疑情跡
卽告知本管官令其薙髮回家或由地方官遞送
回籍其無籍可歸者並著妥爲安置卽或跡涉可
疑亦必解送大營訊明妥辦如有搶奪財物私行
殺害者卽按軍法從事本管官不行查辦一經查
出立即從嚴叅辦庶被脅者有生還之樂聞風者
深歸向之忱現在各路官兵攻剿江浙兩省兵威

甚盛正斯民自拔來歸出水火而登衽席之日著
江浙各督撫刊刻謄黃在賊氛附近之處各路張
貼徧行曉諭凡裹脅難民除甘心從逆爲賊畫策
者殺無赦或不能及早反正將來克復城池隨賊
打仗抗拒官兵悉行剿殺外其餘一切爲賊所陷
者概予免罪如能立功自效並准酌給獎勵以示
覆幬生成咸與維新至意

二十五日丙子慶端奏言逆匪盤踞甯波鎮海慈

谿奉化象山各城自本年二月閒分股竄擾定
海經已革護浙江提督陳 昌章等痛勦後伏而
不動各屬士民因遭蹂躪共興義憤有結團殺
賊之舉並有願爲內應者臣接據探報當飭署
甯紹台道張景渠等妥爲激勸以圖恢復數月
以來招集潰軍整頓團練並令遊擊布興有等

陸續調募閩廣礮艇七十餘號四月初六日陳世章等督同署甯波府知府林鈞署鎮海縣知縣吳寶仁等由定海拔隊進攻鎮海初七日駛近鎮海之關口賊船開礮迎拒我軍鏖戰三時擊沈賊船五十餘隻乘勝駛進關內轟斃賊數百名燒燬賊船二十餘隻並將城外賊卡燒燬督兵攻城該逆死力抗拒兵勇受傷不少初八

日陳世章等令布興有等分門環攻互有傷亡
各鄉紳董民團二萬餘人先將四鄉賊卡踏毀
殺賊二千餘人軍威益張我軍奮勇衝突槍斃
黃衣賊目十餘名賊衆鼠竄回城布興有等連
夜環攻緣城而上賊衆四散奔竄初九日將鎮
海縣城收復陳世章等卽於是日督帶師船駛
攻甯波各鄉集團十餘萬初十日賊由東渡門

出隊我軍殲勦民團在浮橋一帶殺賊多名十
一日陳世章等派令兵勇上岸夾攻監生鄭維
春招勇五百人助勦賊匪憑橋固守未能卽下
十二日陳世章等督同礮艇乘潮駛進鄭維春
帶團馳赴義和門堵截遊擊李光三礮船駛近
東渡門開礮賊亦開礮迎抵適英法兩國火輪
兵船在港停泊齊開大礮布良有管帶勇丁民

團由江東陸路截擊賊開靈橋門衝過江橋我
軍接仗逾時殺賊數百名舟師往來夾勦擊坍
賊卡數十座我軍奮勇登城當將郡城克復餘
賊由西北兩門分竄自相踐踏死者不計其數
各勇追殺奪獲旗械槍礮不可勝計陳世章等
遣員分赴慈谿奉化象山各縣密諭民團攻賊
並派候選縣丞查廷楨等帶兵會勦於四月十

三日收復慈谿該逆因民團兇勦無路可逃十
四日回竄慈谿被兩國輪船駛往太平橋一帶
開礮轟擊斃賊無算賊即敗奔張景渠等復派
兵勇民團由陸路勦洗於十五日再復慈谿縣
城奉化縣知縣屈永清等率團於四月十四日
克復奉化縣城殺賊二千餘人象山縣知縣嚴
家承紳士李椿等趕集團練請派官軍馳往督

總兵秦如虎會商溫州鎮道酌派一旅之師約
會台州民團馳赴助剿並飭陳世章張景渠等
乘勝進剿恢復紹興前由青田竄擾景甯雲和
之賊據署臬司張銓慶稟報景甯一股旋即併
竄雲和經官軍民團連日圍剿賊匪窮蹙竄回
處州郡城所有雲景兩縣均無賊蹤現檄秦如
虎等由青田泰順進兵遊擊白瑛等各軍由景

甯雲和進兵規復處州郡城林文察等迅拔松
陽廓清處境至克復甯波郡縣情形係據陳世
章張景渠等來稟容再確查是否相符另行覈
辦奏入

上命議政王軍機大臣傳諭慶端左宗棠曰現在溫
台兩郡業已肅清景甯雲和之賊亦經竄回處郡
浙省軍務漸有轉機正宜乘勝進取以期殄滅賊

氛現據探報紹興府屬之新昌縣已爲天台民團越境攻克卽著慶端左宗棠查明確實情形具奏並著飭令溫台甯波各郡官紳激勵民團迅將紹郡各城攻克仍飭總兵秦如虎督兵進規處郡會同總兵林文察一軍速將處州城池攻拔以圖進攻金華爲節節掃蕩之計左宗棠駐軍衢郡日久未見奏報現在攻剿情形如何著卽迅速具奏以

慰廑念該撫身任疆寄浙江通省全局皆宜統籌
兼顧不得專顧衢郡一隅此時浙東賊勢已蹙該
撫正宜乘機節節進剿使浙東西各路賊匪不暇
兼顧自易得手並著嚴催劉培元蔣益澧各軍迅
速赴浙以厚兵力至甯波克復諸城風聞多係民
團之力若令該失守地方文武各員將民團勞績
攘爲已有爲開復罪名地步該民團出力之處反

被淹抑何以激勵將來著慶端左宗棠確切查明
據實保奏其溫台一帶出力民團並著一體查明
覈保以勵人心至陳世章張景渠均係革職拏問
之員所犯情節較重據慶端奏現飭該員等恢復
紹興並稱克復甯波等郡縣係據該革員等稟報
無非欲以收復浙省各城之功歸諸該革員等或
將其名附入出力兵團摺內爲該革員等開復地

步所請斷不准行著左宗棠仍遵前旨將陳世章
張景渠嚴行審訊按律定擬具奏紹興府等城仍
著慶端左宗棠乘機迅派賢員激勵民團力圖克
復至攻克甯波等郡縣五城情形據稱係陳世章
等稟報容再確查等語卽著慶端左宗棠詳查具
奏再行明降諭旨

慶端又奏言查青田縣城先被大股逆匪竄踞

溫處道支方廉飭團董何東泮管帶礮船駛往
攻擊已革知縣高樑材召集西枌溪團勇助剿
青田縣知縣吳兆祥聯絡各鄉民團訂期會攻
總兵秦如虎派忠毅全軍並守備侯定貴等帶
隊扼紮壘溪千總蕭邦佑帶長龍礮船進擊四
月初九日吳兆祥等率團行抵水南與賊接仗
獲勝各路兵勇鄉團齊至直薄城根分門圍攻

該逆負嵎不出連攻三晝夜十二日吳兆祥等
率勇由東門架梯而上勇船協力助勦該逆抵
敵不住紛紛由西門一路竄去當將縣城克復
奏入報

聞

二十六日丁丑李鴻章奏言自虹橋泗涇大股賊

匪敗遁浦西附近各處均暫安堵青浦嘉定仍

有悍賊分守臣飭參將程學啟等乘勝襲攻青浦適陰雨兼旬湖河盛漲無路可進應再厚集兵力徐圖進取至浦東一帶經知府潘鼎新都司劉銘傳收復南匯川沙後督同投誠勇目吳建瀛等於五月十一日攻復奉賢縣城潘鼎新劉銘傳進紮該縣派劉玉林所部千人進紮柘林探知逆衆盤踞金山衛聯營數十里以阻我

師五月二十八日潘鼎新飭令劉玉林帶隊進
攻是夜初更出其不意分路劫營二更行抵漕
涇當令哨勇四面埋伏號礮一響我兵大呼掩
殺該逆紛紛驚竄登時燒燬賊營三座殺斃及
踐踏落水死者不計其數劉玉林連夜帶隊追
擊三十餘里至金山衛城將東北門外賊營盡
行踏毀該逆入城堅守連日探聞金山衛踞逆

以大股屯於西路二十餘里相爲犄角又由浙江添賊數千冀圖合股再逞劉玉林等派隊進剿屢獲小勝臣查浦東數百里之地漸就肅清惟金山衛一城爲江浙毗連要隘必須速圖攻克以重兵屯守庶柘奉川南各隱縣門戶可保上海松江對面局勢亦寬因飭潘鼎新劉銘傳均紮營漕涇由海塘進東北一路並調副將華

爾帶常勝軍千人同參將李恆嵩山張堰進西
南一路會攻金山衛城又調參將覃聯陞帶勇
進紮奉賢爲後路援應奏入

上命議政王軍機大臣傳諭李鴻章曰浦東一帶自
收復南匯川沙後復將奉賢縣城攻復逆衆盤踞
金山衛以阻我師金山衛城爲江浙毗連要隘須
速攻克駐守以保川南柘奉各廳縣門戶並展上

海松江對面局勢李鴻章已飭知府潘鼎新都司
劉銘傳等各營並調副將華爾等軍分路進攻派
兵援應卽著詳慎進兵妥爲辦理務期浦東早日
肅清

二十八日 己卯 駱秉章奏言石逆自涪州敗竄訶

知我軍倍道回顧重慶該逆不敢窺伺遂由山
徑橫竄其零股三千餘人由南川境內急趨貴

州桐梓一帶石逆則擁衆數萬圍攻綦江縣城
知縣楊銘率衆登陴固守該逆晝夜環攻楊銘
之弟楊鏐親督練勇堵禦悍賊百人緣梯而上
突將楊鏐砍傷殞命楊銘見勢危急督勇奮擊
立將登城之賊殲斃礮石雨下城下之賊傷斃
甚多不敢繼登遂併力挖掘地道意圖轟城維
時知府唐炯已率黔勇追至紮營老瀛山與賊

對壘知城圍甚急先攻石佛岡以通東門遂於
四月初十日分隊進攻遙聞城內礮聲不絕該
逆已於十一日將南門轟陷十餘丈幸城內先
掘內濠並築土垣知縣楊銘等親督團勇據住
內牆槍礮環擊練勇越濠血戰賊不能進其時
唐炯已督隊由白塔直攻石佛岡槍斷浮橋乘
勢焚燒賊營復派通判李忠清等督勇由下游

渡河分赴南北兩門截擊城內團練奮勇殺出
前後夾擊賊勢披靡城圍立解道員曾傳理率
果毅營先期馳駐合江以扼上竄瀘州之路臬
司劉嶽昭率果後營豫紮江津之先市場以備
迎擊總兵唐友耕亦由重慶馳至與唐炯合隊
跟追該逆旣難回竄悉數繞赴貴州仁懷境內
由山徑潛行以出敘永聽占踞廢城經代辦敘

永廳同知劉廷植等督飭兵勇悉力堵禦該逆遂於二十八日向興文奔竄維時股匪張逆圍攻江安道員曾傳理由藍田壩急趨江安以遏其勢張逆聞風解圍先遁迎投髮逆併力攻陷長甯縣城勢將出安甯橋仍圖竄擾江安臬司劉嶽昭派營馳扼安甯橋迎擊復派三營繼發將士奮勇齊進賊不能支追斬無算總兵唐友

耕知府唐炯亦從興文轉戰而前將後隊餘匪
掃蕩聯營進扼曹村口竹洞水兩處要隘賊旣
不得逞於東北遂分股竄至琪縣等處道員曾
傳理等先期馳至敘郡該逆踞巡檢寺堅築營
壘分股擾及桂花坳其沙河驛之賊已被劉嶽
昭督率所部分道進攻斬擒不少餘賊竄併巡
檢寺一處劉嶽昭進軍花灘以扼下竄敘州之

路曾傳理直取桂花坳並移熊煥章一軍於復興場以圖合攻五月二十二日我軍甫至桂花坳賊卽擁衆萬餘人來撲我軍分投迎擊賊衆布滿山谷相持逾時都司劉鶴齡率親兵數十人衝入賊陣諸營隨進賊大奔潰我軍跟追將近巡山寺劉鶴齡陷陣身中矛傷曾傳道

黃鼎率後隊馳賊勢稍卻熊煥章由左路山

梁壓下右路各營乘勢包抄將賊衝爲兩段我軍先將大廟村賊壘焚燬賊遂大敗拌命奔入巡檢寺熊煥章揮親兵衝入賊壘潘長青率衆繼之我軍四面並進復縱火焚其巢場外之賊悉皆鼠竄場內之賊焚斃殆盡我軍追殺十餘里沿途斬馘以千計餘賊翻山越澗遁回長甯分擾珙縣之賊亦被參將吳嘉春督勇擊退該

逆於二十三日復以大股直撲曹村口竹洞水
唐炯等扼住山梁唐友耕由曹村口峽中直前
搏戰賊衆分路疊進層層包圍唐友耕受傷裹
創下馬步戰勇氣百倍唐炯唐大有督隊左右
衝擊賊勢已挫突出千餘人直趨山梁意圖攻
撲營壘千總林光福揮兵迎敵千總唐友貴單
騎突陣賊衆辟易守壘兵勇乘勝擁出礮斃及

墜巖死者甚多曹村口賊匪紛紛敗潰而竹洞
水一路之賊意欲俟曹村口得勢合力以襲我
軍李忠清等分隊伏於兩面山坡林箐之中以
數十人誘賊漸入峽中伏兵突起兩面夾擊姜
星明復率所部繞出賊後賊遂狂奔我軍合隊
追至石筍沿途賊屍枕藉兩路共斃賊二千餘
名該逆仍退回長甯六月初一日復出大股直

撲唐友耕營盤該總兵整隊拒敵該逆屢撲屢
卻傷斃無數初二日唐大有等分隊出擊適劉
嶽昭派隊由安甯橋馳至內外合擊賊屍縱橫
遍野共計殲斃四千餘名追殺十餘里初六日
曾傳理約會熊煥章分五路出隊先將香鑪山
玉黃場一帶賊卡埽平其洞底一處尤爲險要
該逆併力死拒各營乘勝進攻賊衆棄壘而遁

劉嶽昭亦出隊將援賊截回該逆屢經挫衄現
在圍聚長甯以爲負隅前竄桐梓零股疊經黔
軍追擊不暇喘息由雲南鎮雄地界奔竄大壩
瀘衛將由興文竄合長甯巨股臣現已飭臬司
劉嶽昭等三面偪圍迅圖克復長甯縣城將該
逆全股蹙之南而山中以期聚殲而除巨患綦
江縣知縣楊銘力守危城於垂破之際竟能保

全復將賊匪擊退應請以同知直隸州卽補楊
銘之弟楊鑠守城捐軀其妻陳氏聞夫被害當
率子女三人投池以殉情尤可憫應請將楊鑠
照七品職員

飭部從優議卹其妻陳氏照例旌表長甯縣文武俟
查明下落再行辦理其力解綦江城圍暨踏平
巡檢寺賊壘大挫兇鋒固守曹村口營盤以少

擊多尤爲出力各員弁仰懇

皇上立沛恩施分別獎勵其餘出力員弁及陣亡弁
勇容臣查明奏請獎卹奏入

上諭內閣曰石逆自涪州敗竄後擁衆數萬圍攻碁
江縣城知縣楊銘率衆固守其弟楊鑠督勇堵禦
突被悍賊緣梯登城砍傷殞命知府唐炯率黔勇
由石佛岡攻進立解城圍道員曾傳理率衆先駐

合江扼賊上竄臬司劉嶽昭總兵唐友耕會同唐
炯率隊跟追沿途截殺該逆圍攻永甯復經兵勇
擊敗向興文奔竄其另股賊匪張逆圍攻江安因
官軍由藍田壩急進遂聞風解圍先遁勾結石逆
攻陷長甯縣城經劉嶽昭等派隊迎擊追殺無算
賊遂分竄珙縣及高縣之巡檢寺等處復經曾傳
理馳勦將賊壘焚燬餘賊遁回長甯其分擾珙縣

之賊亦被參將吳嘉春擊退曹村口竹洞水等處
賊匪均經我軍兩路迎擊斃賊不計其數仍著略
秉章督飭唐友耕等乘勝進剿毋留餘孽此次尤
爲出力之綦江縣知縣楊銘著以同知直隸州知
州卽補遊擊潘長青著以參將升用都司劉鶴齡
著以遊擊升用守備唐大有著以都司升用千總
姜星明著以守備升用唐友貴李洪恩林光福均

著以守備升用並賞戴花翎遊擊李元龍莫奎均
著留於四川補用並賞加參將銜候選同知曾傳
道著賞戴花翎通判李忠清知縣柳崇芳均著免
補本班以同知用府經歷鄭金釗著免補本班以
知縣卽補擬保府經歷縣丞秦春臺著仍以府經
歷縣丞不論雙單月儘先選用縣丞楊承瑞著賞
戴藍翎以示鼓勵知縣楊銘之弟楊鏊守城殉難

著照七品職員交部從優議卹伊妻陳氏投池殉
節著照例旌表長甯縣失守之文武各官下落著
略秉章查明具奏